

Preassadieđáhus – Voi_Ice In Cube

Mañimus oassi musihkka triologias lea dál gárvanan.

Dán triologi-konseaptas lea komponistta ja musihkkára Johan Sara jr.:a jurdda leamaš čájehit luođi álggaheami. Dego dokumentašuvda mo sámi musihkka-luohti lea vánddardan ja ceavzán dássáži.

Jearaldagaid leat leamaš: gos álggii luohti, gos ihte dat iešguđet šuoŋat ja makkár nuohtat ledje álgoálggus? Ledje go luonddujienat vuodđun?

Sámi luohtti lea ávkkálaš ja mánggabealat, ja das lea hui stuorra ovddinanvejolašvuohta. Dan lea komponista čájehan dán konseptas skearruin "Luđiin muitalan", "Transmission", ja dan mañimus "Voi_ice in cube". Olbmo jietnageavaheapmi lea leamaš vuodđun guovtti daid skearruin, ja nugo diehtit lea maiddái jietna váldoinstrumeanta sámi musihkkaárbbis.

Giella lea fas eará ássi. Don dihtet varra ahte leat mángačuohte sáni mat govvidit jiena ja muohtaga. Oassi dáid sániin leat mielde "Oassi guhtta / Part six":as.

Luođi ideologija, muhto maiddái dan ovddidanvejolašvuohta lea čielgasit čátnon lundui, ja luođi ávkkálášvuohta ovttas ovdanbuktimiin ja teknihkka vuoiŋŋa ja jiena bokte, dahket dán skearru gelddolažžan ja ođđaáigásažžan jietnagovas, gos duššefal lea geavahuvvon olbmo jienat mat lea oahpistuvvon luonddus. Mánŋa daid jienain leat loopejuvvon, buvttaduvvon ja biddjon elektrovnnálaš proseassa čađa.

Komponista lea deattuhan sátneráju luođis ja musihkkálaš vehkkeneavvut maid lea geavahan leat earret eará skádjahivvodat, mikrotonaliteta, mikrorytmihkka, badješuoŋŋa ja melodiijalaš fáttát main lea dynamihkka. Komponista lea dán skearruin ráhkadan čieža oktilaš buvttusa surround 5. 1. formahtas mas lea alla luvvi. Dán ferte vásihit!

12 jagi lea geavahan čadahit dán prošeavtta. Prošeavtta jurddašeapmi lea dađistaga rievdan ja nu mo komponista muitala: "Váldojurdda lea leamaš ohat luođi čiegusvuodaid ja kodaid, erenoamáš mátki sámi musihkkaetnologálaš máilmmis guhkin dávvin daid sirkumpolara báikkiin gos čuovga alo báita." Guokte hui buorre veahkkiguovttos leaba leamaš mielde konseptas. Ole Larsen Gaino, 80 jagi boaris – meaštir árbevirolaš luođis ja John Andre Eira, 21 jagi, erenoamáš taleanta árbevirolaš luođis gii galgá doalvut sámi musihkkaárbbi boahttevaš buolvadahkii.